



Broj: 03/11-05-1-1822/16

Sarajevo, 29.7.2016.

KOLEGIJIMA OBA DOMA PARLAMENTARNE SKUPŠTINE BiH

KOMISIJI ZA VANJSKE POSLOVE PREDSTAVNIČKOG DOMA

KOMISIJI ZA VANJSKU I TRGOVINSKU POLITIKU, CARINE, SAOBRAĆAJ I KOMUNIKACIJE DOMA NARODA

ZAJEDNIČKOJ KOMISIJI ZA LJUDSKA PRAVA

KOLEGIJU SEKRETARIJATA

IZVJEŠTAJ S OTVARANJA SJEDIŠTA MEĐUNARODNE KOMISIJE ZA NESTALE OSOBE (ICMP)

Hag, 7. i 8. juli 2016.

Povodom obilježavanja **20. godišnjice postojanja i rada Međunarodne komisije za nestale osobe (ICMP), u Hagu je 7. i 8. jula 2016. godine održana svečanost otvaranja sjedišta ICMP-a, kojoj su u ime Parlamentarne skupštine BiH prisustvovali Mario Karamatić, delegat u Domu naroda i drugi zamjenik predsjedavajućeg Zajedničke komisije za ljudska prava, te Lara Borovina iz Sektora za međunarodne odnose i protokol. Događaju je prisustvovao i ambasador Bosne i Hercegovine u Kraljevini Holandiji Ahmet Halilović.**

Na svečanosti otvaranja prisutnima su se obratili: predsjednik ICMP-a, ambasador Tomas Miler; bivši premijer Holandije, Vim Kok; ministar vanjskih poslova Holandije, Bert Koenders; N.J.E. jordanska kraljica Nur; gradonačelnik Haga, Jozias Van Artsen; Norah Fuatam (predstavnik porodica nestalih iz Ugande); Ram Kumar Bandari (predstavnik porodica nestalih iz Nepala).

Govornici su istakli značaj koji je ova organizacija ostvarila u Bosni i Hercegovini, kompleksnost globalnih izazova s kojima se suočava u rješavanju problema nestalih osoba, dobru saradnju sa institucijama vlasti i porodicama nestalih, te izrazili političku i finansijsku podršku, koje su neophodne u budućem radu i aktivnostima ICMP-a bilo gdje u svijetu.

Drugog dana održana je panel-diskusija s članovima porodica koji su izgubili svoje najmilije širom svijeta usljed konflikata, kršenja ljudskih prava, katastrofa, organiziranog kriminala.

Iz Bosne i Hercegovine u raspravi je učestvovala Munira Subašić, predsjednica pokreta „Majke enklave Srebrenica i Žepa“, čiji su sin i muž, te još 20 članova porodice ubijeni u Srebrenici u julu 1995. godine. Munira je ispričala da su sve majke koje su izgubile svoje

najmilije čekale 20 godina na pravdu, te da su 1996. godine, u namjeri da saznaju sudbinu svojih članova porodica, osnovale nevladinu organizaciju pod nazivom „Majke enklave Srebrenica i Žepa“. Njihov cilj je da djecu koja su ostala bez roditelja ne uče mržnji, nego da ih usmjere na pravi put, kako bi izrasli u zdrave ljude, jer se čovjek koji je bolestan može izliječiti, a mržnja je nešto što se ne može izliječiti.

Blanka Luz Nava Velez iz Meksika je majka jednog od 43 studenta koji su nestali u septembru 2014. godine nakon što su autobusom krenuli na demonstracije. Roditelji nestale djece obraćali su se meksičkim vlastima, međutim, vlada ih sprečava da saznaju pravu istinu o nestaloj djeci. Blanka Luz je predstavnicom roditelja 43 nestala studenta iz grada Aycinapa.

Ram Kumar Bandari iz Nepala već 15 godina traži oca, kojeg je policija uhapsila. Policija je priznala da je uhapšen i obavijestila Rama da je njegov otac ubijen kada je pokušao da pobjegne. Međutim, ni uz pomoć Komisije za ljudska prava Ujedinjenih naroda, Ram još uvijek nije pronašao tijelo svog oca. Ram je osnivač i predsjednik Nepalske nacionalne mreže porodica nestalih osoba.

Brat supruge Denisa Šutena iz Holandije i njegova djevojka nastradali su na letu MH17 iz Amsterdama za Kuala Lumpur u julu 2014. godine. Denis je istakao da porodice nestalih traže da dobiju informacije o nesreći koja se dogodila, te da dobiju priliku pristupa mjestu gdje je avion srušen.

Norah Fuhum iz Ugande je izgubila sina kojeg je Božja vojska otpora (LRA) otela zajedno sa ostalim studentima koji su se autobusom vraćali kući u septembru 2002. godine. Njena želja je da se porodicama nestalih dozvoli da pronađu svoje najmilije; žive ili njihove posmrtno ostatke, kako bi ih mogli sahraniti i zatvoriti to poglavlje u svojim životima.

Brat Alija Ailelea iz Sirije je uhapšen u gradu Deir Ezor u februaru 2012. godine, samo zato što se pridružio mirnim demonstracijama. Od tada Ali nema nikakve informacije o svom bratu. Putovao je 28 dana do Evrope, gdje sada živi u izbjeglištvu. Osnovao je grupu civilnih aktivista „DeirEzor24“ koja dokumentuje slučajeve nasilja koje su u tom gradu počinili sirijski režim i tzv. islamska država.

Pripremila:

Lara Borovina

viši stručni saradnik za saradnju s
međunarodnim organizacijama

Dostavljeno:

- naslovu
- a/a